

大方廣佛華嚴經論卷第七

又七

唐方山長者李通玄造

○第四明成佛同別夫智身寥廓總萬象以成軀萬象無形與智身而齊體違真相隔得本形同只爲垂本相殊致使化儀各別或見

又七

形羸道樹藉草蓐以微軀或見色究竟天處蓮華之妙相或見寶菩提樹居淨土以成真或見遠劫修行或見剎那當證或見報身圓滿相海無邊或見化體分身具三十二相如是殊形異狀徧含識以情根萬別千差言何

能悉且約人天共感四乘權實之流畧作十門成道差別使得童蒙起信發解除疑識本離權情希勝德十門者△第一成佛身別△第二成佛時別△第三菩提樹別△第四所坐座別△第五同住衆別△第六所示相別

△第七轉法輪別△第八轉法輪處別△第九大會莊嚴別△第十所受法門別

△第一成佛身別者此毗盧遮那佛身如經所說有九十七種相及無盡相身非三十二相八十種好身

△第二成佛時別者如權教中佛生之後即以逾城出家菩提樹下成等正覺時以之爲時如毗盧遮那佛即實不如是如來安立化相爲度三乘衆生應見如是出家成佛如華嚴經中實法界海即不如是如法華經云吾從成佛已來經無量阿僧祇劫此即是迴彼三乘人就實而論此毗盧遮那佛依本法界成大菩提還依本法界無始無終不出不沒無成無壞無有時分此經云如來不出世亦無有涅槃此爲實說又頂著華冠本非出家

都無八相之事若有人能知如來不出不沒
不成不壞即知如來常住在世常轉法輪即
是毗盧遮那出興於世又從兜率天下降神
入母胎轉法輪入涅槃不出一剎那際彼天
猶未下母胎猶未出此已入涅槃一切法事

六

二

總畢

△第三菩提樹別者三乘之中見佛道樹是
木樹高下稱人間如一乘中如來成道所居
之樹即寶樹高顯殊特如金剛藏身中所現
之樹高百三千大千世界其身周圍廣十二
千大千世界大意總一切處徧故

△第四所坐座別者三乘中化身成道棄榮
貴藉草蓐此一乘中本身成道坐寶蓮華師
子之座妙寶嚴飾具眾莊嚴

△第五大眾別者爲毗盧遮那佛所有大眾

圍遶皆是普賢文殊等眾及有新發意者皆
是志求佛果法界之眾非是三乘權學爲求
聲聞緣覺厭苦菩薩之道樂生淨土之眾設
有聲聞之眾若未迴心如聾不聞不知不見
說此甚深華嚴經典亦非因前經三祇劫後
得果之眾也皆智圓多劫一際無前後時之
眾

△第六示相別者如權教中即以兜率天受
生降神入胎八相成道等一乘教中即以初
發心住會法身本智以爲正覺情絕始終不

六七

三

見時遷及以不遷不乖當念蘊功即佛都無
時分遷轉之相應真自性常轉法輪不似權
教八相等事或於摩醯首羅天坐華王之寶
座或以三千大千之國土以爲報境如是施
設分量限劑者皆引眾生之化儀漸令心廣

未爲究竟之實相也如此華嚴法界之妙門者約分十佛刹塵蓮華藏刹海叅映重重爲明無盡佛國互相徹入一一佛刹皆滿十方十佛刹塵國土皆無限礙身土相稱都無此彼往來之相不同三乘爲小根故權安分劑身土之相如此盧舍那之相海也纖塵匪隔其十方毛孔詎虧於刹海三乘示相者螢光不可以比日月之照功琉璃難以類摩尼之淨德此乃非由佛爾只爲器劣故然

△第七轉法輪別者化佛轉三乘法輪毗盧遮那轉一乘法輪一乘者所謂佛乘如法華經云佛乘唯有一無二亦無三但以假言說引導於羣生乃至乘如來乘直至道場爲法華經會三乘引令至實如前依判教分宗門中已說只爲三乘種性人還依本種性作三

乘教說說龍女刹那成佛是化反成謗教不順佛心元佛本意者令龍女刹那成佛爲本法法自無時證盡時處即爲實法反云是化此是苦哉當復奈何不期甘露反成毒藥翻將寶玉喚作泥塵以實爲虛將虛爲實請後達士莫踵前賢先聖法門普咸垂訓隨根權實事非一途深可久思具開佛意了明權實順教流通不滯諸根權實俱濟只可引小歸大衆聖允心以實成虛佛不悅可依宗傳教福利人天使得金玉煥然各不沈沒是故毗盧遮那佛說佛乘化佛說三乘化佛教中法華涅槃漸漸引權令歸實門即龍女刹那成佛雪山肥膩草喻若牛食者純得醍醐等是也皆爲分有未具全示一一具足因果報相之門唯此華嚴具足是故今言轉法輪別

△第八轉法輪處別者權教中化佛轉法輪
或言鹿園或言給孤獨園等皆有處所上下
往來此經即十處十會及一切塵中佛國佛
身重重重重無盡無盡常轉法輪
不去不來不出不沒十會名處後當更明皆
云不離菩提場而昇一切處經自具言

△第九大會莊嚴別者說此經時天上人中
十會十處一時普集十方聖衆大心衆生無
有三乘定性未迴心者設在其會不在其流
又十會之衆各從十方來隨所來方皆云有
十佛刹微塵衆而來集會位位地地以次十
百千增多爲明無盡又一一會衆皆徧法界
重重重重然光影像纖塵之內亦衆會重重
一一塵中衆會皆與法界虛空等乃至於一
小衆生身內成等正覺衆海重重轉正法輪

其彼衆生不知不覺如是衆會皆爲諸佛菩
薩性徧一切處身土衆會皆徧一切處故不
似三乘中化佛衆會皆有處所限量分劑往
來爲衆生根小非佛故然

△第十所授法門別者如權教中或從小乘
漸漸修習無常苦空厭老病死修四諦觀於
中苦集二諦以爲世諦滅道二諦以爲真諦
觀彼苦集真實是苦深生厭離趣求寂滅以
無常不淨白骨等觀觀彼微塵成於空觀故
苦集本無識滅智亡以空爲證且令苦盡然
後方爲說大乘法令使迴心修法空觀行諸
六度漸起悲智或有大乘菩薩種性者觀行
對治似彼小乘性有慈悲樂行諸度不取空
證留惑益生成法空等觀或有大乘菩薩種
性一下頓修假真如等觀以假真如門加行

調伏經三僧祇劫十地見性方始成佛或有教說地前三賢菩薩以觀力故折伏無明地上見道或有教說三賢菩薩少分得見法身如是等說總是三乘權教所說如此華嚴經即不爾直爲上上根人一下直授法界自體

根本法身古佛智海迷在無明頓令以方便三昧而令現之全將佛果頓授十住初心一念一時一際一法界門頓收文殊普賢萬行理事更無情量卷舒延縮不廢隨俗時劫了然具存三世日月歲數差別了然明著然其歲劫當自不移常與無常不成不壞法本如是了知苦諦本來聖諦元無諸苦亦無涅槃若如是信解如是證入經云以少分方便疾得菩提即以智幻門幻生其身等衆生界同衆生事即以無礙念門了衆生根即以師範

門以成軌則即以衆藝門訓誨衆生即以無依道場門法無所著即以無念門念而不著即以淨智光明門恒照無礙安立諸法度脫衆生即以無盡相門不壞色身即以誠願語門出言誠諦即以幻住門常住世間成就衆生諸根解脫如是十法即是善財童子等覺位內善知識利安衆生之門令諸學者頓修悟入行此十法利安衆生善住世間解脫法門殊非如三乘之衆厭苦集樂滅道之法也亦非留惑樂空出纏別求淨土也

六七

大

○第五明見佛差別夫佛身性相一體無差器有萬端依根各異情存想隔見絕體齊身立影生情留佛異佛由情應以此乖真心盡情亡智身自稱隨緣無作動寂俱真如是相應名毗盧遮那佛也毗盧遮那者名種種光

明徧照也以法身悲智示相教光用對諸根
隨情現色爲情垂相別見異佛殊以體用混
收本是毗盧遮那一智身也只可歸真去假
不可滯假亡真畧立十門見佛差別使得留
心創信者返末而還源也

×七

△一人中見佛但有三十二相

七

△二諸天見佛但有八十種好

△三諸龍見佛或同人所見或見但爲大龍

王也餘畜例然

△四諸仙人見佛但見仙人

△五諸餘外道還見佛與已同類

△六八部神等見佛與已爲王

△七小乘人見佛爲大聲聞

△八緣覺人見佛還爲緣覺

△九權教中菩薩見佛但爲三千大千世界

之主福智充徧三千大千世界

△十一乘教中菩薩見佛爲十佛刹塵蓮華
藏世界海爲法界主具云十佛刹塵蓮華藏
世界爲明無盡總攝一切刹故福智充滿一
切諸刹無盡相海重重故如上十種見佛不
同皆由發心之時信樂差別以信樂力故見
佛不同是故當知發心之者發廣大心信廣
大教門發廣大願行廣大行入廣大智利益
成就無盡衆生即得速成菩提行願福智悉
皆圓滿若不如是終非畢竟成大菩提勞而
功少何如直往一切智之本智中也

○第六明說教時分夫創證覺心道源虛寂
智圓三世始終俱盡會萬象齊有無混去來
印今古豁達唯神恬泊應真情亡智立想絕
悲存圓聲遐布隨根受益一雨普滋百卉齊

得如空谷響稱擊成音諸機獲益任智無心
刹那無際焉存古今畧依權實且立十種教
起前後時分不同

△第一如力士經說佛初成道一七日思惟
已即於鹿園說法

△第二如大品經說佛初鹿苑轉四諦法輪
無量衆生發聲聞心乃至獨覺心大菩提心
等

△第三如法華經說三七日詣鹿園說法

△第四如四分律及薩婆多論六七日方說

法

△第五如興起行經及出曜經七七日方說

法

△第六如五分律八七日方說法

△第七如大智論五七日方說法

又七

△第八如十二遊經一年不說法

△第九依今唐朝藏法師判如來成道定經
二七日後方說華嚴經

△第十通立今依此華嚴經法界門總不依
如上所說如此經以法界本智性自體用理

事大悲本實爲宗不依情量時分之說古今
見盡常轉法輪無始無終法本如是如上所
說總依根自見時分並非如來有此不同如
來本法智體並無時分可立但使令心信解
法界無時即是如來說法時也情亡心盡任

八七

九

智利人即是如來成佛轉法輪時也若也情
存立見云如來如是時出世如是時說法者
並不依佛見總是自情如此華嚴經教門即
是無始無終爲門不可逐情強立時分此經
乃是無時之時一切時說如法華經云吾從

成佛已來經無量阿僧祇劫者量既本無知欲將何爲說法時也皆是如來一智用一圓音一刹那時以無時之時爲說法時也

○第七明淨土權實夫以滔滔智海茫茫莫究其涯淼淼真源蕩蕩罕尋其際遮那法界

體相括於塵沙方廣靈門淨穢互參於無極

但隨自修業用見境不同致使聖說乖違依根不定或權分淨土於他國指穢境於娑婆或此處爲化儀示上方爲實報又殊住居東國金色世界而來觀音身處西方安樂妙土

而至如是權儀各別啟蒙的信無依今以畧會諸門令使創修有託約申十種以定指南

△第一阿彌陀淨土△第二無量壽觀經淨土△第三維摩經淨土△第四梵網經淨土△第五摩訶首羅天淨土△第六涅槃經中

所指淨土△第七法華經三變淨土△第八靈山會所指淨土△第九唯心淨土△第十毗盧遮那所居淨土

△第一阿彌陀淨土者此爲一分取相凡夫未信法空實理以專憶念念想不移以專誠故其心分淨得生淨土是權未實

△第二無量壽觀經淨土者爲一分未信法空實理衆生樂妙色相者令使以其心想想彼色像想成就故而生佛國此權非實

△第三維摩經淨土者佛以足指按地加其神力暫現還無是實報土未具陳廣狹是實未廣

△第四梵網經淨土者雖說一大華王而有千華一一華上有百億化佛教化百億四天下衆生然彼千華及彼華王爲三乘菩薩見

未廣故分示報境未成圓滿是權未實

△第五摩醯首羅天淨土者如來於彼坐寶蓮華座成等正覺以爲實報此閻浮提摩竭提國菩提場中成正覺者是化此爲三乘中權教菩薩染淨未亡者說言此閻浮提及六天等是欲界有漏彼上界摩醯首羅天是無漏故心存染淨彼此未亡此爲權教未爲實說

△第六涅槃經所指淨土者云如來有實報淨土在西方過三十二恒河沙佛土外者爲三乘權教一分染淨未亡者言此三千大千世界總是穢土權推如來報境淨土在西方此權非實

△第七法華經三變淨土者此爲三乘權教菩薩染淨未亡者言移諸人天置於他土是

又七

十一

權非實

△第八靈山會所指淨土者此引三乘中權教菩薩染淨未亡者令知此土即穢恒淨諸衆信可未能自見是實非權信而未見

△第九唯心淨土者自證自心當體無心性唯真智不念淨穢稱真任性心無罣礙無貪嗔癡任大悲智安樂衆生是實淨土以自淨故教化衆生令他亦淨故是故維摩經云隨其心淨即佛土淨欲得淨土當淨其心

△第十毗盧遮那所居淨土者即居十佛刹塵蓮華佛國土淨穢總含無穢無淨無有上下彼此自他之相一一佛土皆充法界無相障隔畧言十佛刹塵國土爲知無盡佛國不出一塵爲無大小故不立限量故以法爲界不限邊際相海純禪色像重重比爲實報非

是權收

○第八明攝化境界夫佛境無邊順機各異隨情廣狹見有差殊非是如來分其量數情微即境狹量廣即境寬若也智契真源佛境彌綸法界或見閻浮爲化境或見四洲以濟生或見形滿大千或見報身十海如是種種器有萬端設教不同千差萬別發蒙始學憑准何依畧示五門識其權實使得捨諸條而從本返末而還源速證菩提無令稽障△一人中見佛境界△二諸天見佛境界△三二乘見佛境界△四權教菩薩見佛境界△五實教菩薩見佛境界

△第一人中見佛但見化一閻浮提衆生

△第二諸天見佛者但應自見境見佛亦然隨自見廣狹故如帝釋梵王及諸天王即是

菩薩位即依菩薩位配所見佛攝化境界廣狹不可依諸凡見天人之類如帝釋即是二地菩薩位乃至漸昇至梵天王是十地菩薩位也或時以佛暫時佛神通力成就衆生亦令人天中凡夫及二乘并小菩薩總得見佛報土境界故即如維摩經佛以足指按地所現淨土是也或時以佛神力亦令人天總得相見故即如大集經中所說寶坊之上處欲界上色界下大集人天之衆總在其中如彼經說

△第三二乘中羅漢見佛攝化境界者如大羅漢以天眼力得見佛攝化三千大千之境界也即如阿那律云我以天眼見釋迦牟尼佛土三千大千世界如觀掌中庵摩勒菓如小羅漢即不定或見佛攝化一閻浮提此即

以久伏忍力能斷結使未有定力亦名斷結
未有力通變等事如以次羅漢或見佛攝
化四洲及上三界境界也此廣說在小乘諸
部中

△第四權教菩薩見佛攝化境界者初地百

六七

佛二地千佛三地萬佛境界以此漸增如三

十三

乘大乘教說

△第五實教菩薩見佛攝化境界者初地菩
薩即見多百佛多千佛即是無盡之百不是
一百之百二地菩薩即見多千佛等即是無

盡之千故三地菩薩即云多千萬等以實之
說諸地菩薩皆悉齊見如帝網等三賢菩薩
亦然非但十佛刹塵蓮華藏爲其報境法界
虛空總皆平等爲十住初心初見道時即已
無大小見故即總見佛化境皆如法界不分

大小行布之中寄位階降如此經初地見多
百佛境界者即明滿義故非如三乘單百之
百此多百者即齊無盡之數故如三乘教化
佛即攝一四天下報佛即云攝化千百億四
天下爲一釋迦報境如梵網經所說如華嚴
經所說毗盧遮那攝化境界且約立一大蓮
華藏世界海廣大無際與法界虛空等但爲
化衆生故約陳形狀令衆生心廣大發開狹
劣心故於此大蓮華中總言有十不可說佛
刹微塵數世界種爲教文有限且立其一百
一十一箇世界種中心有十一箇世界種上
下各具二十重蓮華藏世界最下重中有一
佛世界微塵數廣大世界圍遶次上第二重
二佛世界微塵數次上第三重三佛世界微
塵數此十一箇世界種皆悉如是從下向上

轉轉倍增最上重中具足二十佛世界微塵數廣大刹一一刹各有十佛刹微塵數諸小刹圍繞其十一箇二十重世界外有一百箇一重世界種圍繞十一箇二十重世界此一箇世界種外近金剛山復有十箇四重世界種其中國刹重重之內如上所說於金剛山內圍繞如上諸世界種等如天帝網分布而住如來所化周徧其間淨穢純雜諸世界海等如三乘中所說世界種者數三千大千之刹至一恒河沙爲一世界性數性世界至恒河沙爲一世界海數海世界至恒河沙爲一世界種如此經世界並數一佛刹微塵二佛刹微塵三佛刹微塵如是倍增至最上重中二十佛刹微塵數世界如是上下通數總二百一十佛刹微塵數廣大刹始成一世界

十

七

種非爲恒沙以限其數三乘之中多取恒河沙數爲量如此經中常取一佛刹塵十佛刹塵爲表無盡爲其數如是增廣令小狹劣衆生知佛攝化境界發菩提心其佛攝化境界一一塵中境界與法界虛空界等不言獨化三千大千世界於中表法至後釋華藏世界品廣明

○第九明因果延促夫法界圓寂無始無終理智虛空非因非果但爲有情存量假寄其名情亡量絕何名能立名不自施本由量起量亡情盡名亦自真今以無名之真名談無果之真果以無說之真說談無因之真因啓蒙之士不可以滯其名始學之流不可以廢其說滯名則名立廢說則言亡當可任性隨緣起爲法起若無緣者滅唯法滅有此法者

十

五

性不相知今談因果延促如空中鳥跡如石女之子但爲衆生情有愚智隨心照惑遲速不同劈竹登梯稱機各別因茲之類延促不同非謂日月與作時分教不自施因機故起教隨根應有根教生今以依根約立十門因果延促使得啟蒙之士後學無疑也

△第一小乘善來得阿羅漢果

△第二小乘一生得阿羅漢果

△第三小乘三生得阿羅漢果

△第四小乘六十劫得阿羅漢果

△第五緣覺四生得緣覺果

△第六緣覺遲經百劫得緣覺果

△第七依權教菩薩成佛定經三僧祇劫得成佛果

△第八依法華經實教會三歸一令龍女一

刹那成佛破彼三乘經於多劫方始成佛

△第九華嚴經說兜率天子三生得十地果

△第十善財童子一生成佛

如上所說皆是三乘及一乘聖教依根約器所說各各依其部教自有和會今欲廣引諸義文句繁多根有萬端依根教別今以畧分十種大意得果延促不同意令知權向實不滯虛乘入真實門速成佛道如龍女破三乘之定劫成刹那之實門涅槃經屠兒廣額授賢劫中成佛之記者破闢提之無性說越三僧祇之功兜率天子明一乘之教殊勝之力聞之生信爲不修故設入地獄中亦能成種蒙光觸身來生兜率天上登十地位一如隨好光明功德品說舉此一事意令信此諸佛所乘以難信故信即必定成種爲信解內熏

必至成佛設暫著樂遇苦便修若至十住初心位齊十地更無退轉如善財童子一生成佛者明於十住初心一剎那際情亡想盡三世一念更無所生名爲一生不取存情立劫時分之生如是無生便成佛果如本生故名爲一生還同龍女一剎那際情盡時亡名之爲佛

大方廣佛華嚴經論卷第七

音釋

寥落蕭切森莫沼切括古活切